

Na osnovu člana 13. Zakona o principima lokalne samouprave u Federaciji BiH („Službene novine Federacije BiH“ broj: 49/06 i 51/09), člana 10. alineja 2. Statuta Općine Centar Sarajevo („Službene novine kantona Sarajevo“ broj: 23/04), Općinsko vijeće Općine Centar Sarajevo, na 35.redovnoj sjednici održanoj dana 28.12.2023.godine, donijelo je

ODLUKU O PROGLAŠENJU BORAČKIH UDRUŽENJA OD POSEBNOG INTERESA I DRUŠTVENOG ZNAČAJA ZA OPĆINU CENTAR SARAJEVO

DIO PRVI- OSNOVNE ODREDBE

Član 1. (Predmet Odluke)

Ovom Odlukom boračka udruženja koja čine Koordinacioni odbor boračkih udruženja Općine Centar Sarajevo proglašavaju se od posebnog interesa i društvenog značaja za Općinu Centar Sarajevo, a koja svojim djelovanjem doprinose slijedećem:

- a) implementaciji Zakona o dopunskim pravima boraca-branitelja Bosne i Hercegovine („Službene novine Kantona Sarajevo“, broj: 31/22) i zakona sa nivoa Federacije Bosne i Hercegovine;
- b) zaštiti prava, zadovoljavanju zajedničkih interesa i rješavanju značajnih pitanja u društvu za sve boračke kategorije;
- c) realizaciji projekata očuvanja, njegovanja kulture sjećanja i tradicije odbrambeno - oslobodilačkog rata '92-'95. godine i NOR-a '41-'45. godine putem obilježavanja značajnih događaja, datuma i ličnosti;
- d) realizaciji projekata humanitarnog karaktera sa ciljem pomoći socijalno ugroženim pripadnicima boračke kategorije;
- e) realizaciji programa resocijalizacije i integracije boračke kategorije u društvenu zajednicu;
- f) realizaciji programa sportskih manifestacija i memorijalnih turnira;
- g) realizaciji programa pružanja pravne pomoći i cjelodnevni rad sa strankama;
- h) realizaciji programa koji se odnose na sportske manifestacije i memorijalne turnire, a naročito posvećene licima i događajima vezanim za odbrambeno-oslobodilački rat '92-'95. godine u organizaciji boračkih udruženja i sportskih društava;
- i) realizaciji drugih programa koji doprinose zaštiti interesa boračke kategorije.

Član 2. (Boračka udruženja od posebnog interesa za Općinu Centar Sarajevo)

(1) Boračka udruženja koja čine Koordinacioni odbor boračkih udruženja Općine Centar Sarajevo od posebnog interesa i društvenog značaja za Općinu Centar Sarajevo su:

- a) Organizacija porodica šehida i poginulih boraca kao udruženje čija je kategorija priznata kao temeljna boračka populacija Zakonom o pravima branilaca i članova njihovih porodica (Službene novine FBiH, broj: 33/04, 56/05, 70/07, 9/10, 90/17 i 29/2022)- u daljem tekstu Zakonom;

- b) Udruženje dobitnika najvećih ratnih priznanja „Zlatni ljiljan“ i „Zlatna policijska značka“ Općine Centar Sarajevo čija je kategorija priznata kao temeljna boračka populacija Zakonom;
- c) Udruženje RVI Centar čija je kategorija priznata kao temeljna boračka populacija Zakonom;
- d) Udruženje JOB Unija veterana Općine Centar Sarajevo kao najstarija boračka organizacija u Federaciji Bosne i Hercegovine čija je kategorija priznata kao temeljna boračka populacija Zakonom;
- e) Udruženje Demobilisani borci Općine Centar Sarajevo čija je kategorija priznata kao temeljna boračka populacija Zakonom;
- f) Udruženje maloljetni borci Odbrambeno-oslobodilačkog rata '92-'95 Općine Centar Sarajevo, kao udruženje koje svojim projektima i aktivnostima čuva i njeguje kulturu sjećanja i tradicije odbrambeno-oslobodilačkog rata '92-'95. godine putem obilježavanja značajnih događaja, datuma i ličnosti;
- g) Udruženje „BOSNAE“ Zelene beretke Općine Centar Sarajevo čija je kategorija po Zakonu priznata kao organizatori otpora;
- h) Udruženje Patriotska Liga Općine Centar čija je kategorija po Zakonu priznata kao organizatori otpora;
- i) Udruženje Antifašista i boraca NOR-a Općine Centar Sarajevo koji su definisani članom 5. Zakona o dopunskim pravima boraca - branitelja Bosne i Hercegovine („Službene novine Kantona Sarajevo“, broj: 31/22);

(2) Udruženja koja okupljaju boračku populaciju, a nisu proglašena od posebnog interesa i značaja za Općinu Centar Sarajevo imaju pravo na finansiranje iz Budžeta Općine Centar Sarajevo projekata/projektnih aktivnosti navedenih u članu 1. Ove Odluke.

DIO DVA- FINANSIRANJE UDRUŽENJA

Član 3. (Finansiranje)

Udruženja iz člana 2. ove Odluke finansiraju se iz Budžeta Općine Centar Sarajevo u skladu sa planiranim i raspoloživim sredstvima za ove namjene.

Član 4. (Podnošenje prijave za finansiranje)

Udruženja iz člana 2. ove Odluke, po raspisanom Javnom pozivu, dostavljaju prijedloge projekata za finansiranje putem Službe za boračko-invalidsku i socijalnu zaštitu.

DIO TRI- KRITERIJI I POSTUPAK DODJELE

Član 5. (Opći i posebni uvjeti)

- (1) Opći uvjeti koje udruženja trebaju ispuniti:
 - a) Posjedovanje Rješenja o registraciji udruženja (Ministarstvo pravde);
 - b) Uredno ispunjavanje obaveza iz svih prethodno zaključenih ugovora o finansiranju i sufinansiranju iz budžetskih sredstava Općine Centar Sarajevo (ili po osnovu ranije dodijeljenih sredstava, ako nisu zaključivali ugovore);

- c) Uredno ispunjavanje obaveza poreza i doprinosa;
- d) Ovjerenu izjavu u općini da se protiv podnosioca prijave/lica ovlaštenog za zastupanje udruženja, ne vodi krivični postupak i da nije pravosnažno osuđen za počinjenje krivičnog djela (Služba za boračko invalidsku i socijalnu zaštitu će po potrebi, službenim putem od nadležnog organa pribaviti Uvjerenje o nekažnjavanju i nevođenju krivičnog postupka);
- e) Izvještaj o radu Udruženja za prethodnu godinu (usvojen od strane Skupštine);
- f) Način finansiranja udruženja iz drugih izvora sa drugih nivoa vlasti (navesti u prijavnom obrascu);
- g) Program rada za tekuću godinu sa finansijskim planom i obrazloženjem (usvojen od strane Skupštine);
- h) Bilans stanja i bilans uspjeha za prethodnu godinu (FIA);
- i) Zbirni finansijski izvještaj o ostvarenim ukupnim prihodima i rashodima u toku budžetske godine (navesti prihode iz drugih izvora);
- j) Broj članova Udruženja (ažurirani spiskovi iz prethodne godine);
- k) Reference, mišljenja, pohvale i efekti od ranije realizovanih projekata (Izvještaj Komisije za nadzor i koordinaciju).

(2) Posebni uvjeti obuhvataju:

- a) Organizacijske i finansijske kapacitete podnosioca prijave;
- b) Dosadašnje iskustvo podnosioca prijave u provođenju aktivnosti (izvještaji, reference, mišljenja, broj korisnika obuhvaćen projektima);
- c) Kvalitet planiranih aktivnosti – (efekti projekta sa aspekta koji su evidentni i mjerljivi na kategoriji koju zastupa – analize i izvještaji udruženja, ankete – zadovoljstvo korisnika – pripadnika boračke populacije i dr.)
- d) Rezultati koji se očekuju od provođenja programa/aktivnosti koji doprinose zaštiti interesa boračke kategorije;
- e) Broj korisnika obuhvaćen projektima (lista potpisnika korisnika projekata);
- f) Drugi posebni uvjeti prema elementima sadržanim u obrascu za podnošenje zahtjeva.

Član 6.

(Potrebna dokumentacija koja se dostavlja uz zahtjev za finansiranje)

Udruženja iz člana 2. ove Odluke uz prijavu za finansiranje dostavljaju slijedeću dokumentaciju:

- a) Popunjen, potpisan i ovjeren prijavni obrazac za finansiranje programa/aktivnosti koji se preuzima na web stranici Općine Centar Sarajevo ili na info punktu Općine;
- b) Rješenje o registraciji udruženja od nadležnog organa sa zadnjim izmjenama podataka ne starije od 30 dana od dana podnošenja prijave na Javni poziv;
- c) Statut udruženja;
- d) Ovjerena fotokopija uvjerenja o poreznoj registraciji (ID broj), ne starija od 3 mjeseca;
- e) Uvjerenje o izmirenim poreskim obavezama ne starije od 30 dana od dana objavljivanja Javnog poziva za dostavljanje zahtjeva za finansiranje;
- f) Uvjerenje o izmirenim porezima i doprinosima za zaposlenike (ukoliko ima zaposlenika) ne starije od 30 dana od dana objavljivanja Javnog poziva za podnošenje zahtjeva za finansiranje (ukoliko nema zaposlenih dostaviti ovjerenu izjavu);

- g) Ovjerena izjava da se protiv podnosioca prijave, odnosno lica ovlaštenog za zastupanje ne vodi krivični postupak i da nije pravosnažno osuđen za počinjenje krivičnog djela;
- h) Bilans stanja i bilans uspjeha za prethodnu godinu (FIA);
- i) Zbirni finansijski izvještaj o ostvarenim ukupnim prihodima i rashodima u toku budžetske godine;
- j) Dokaz o dostavljenim finansijskim izvještajima o utrošku sredstava;
- k) Program rada za godinu za koju se podnosi zahtjev za finansiranje aktivnosti koji sadrži plan/program i vremensku dinamiku planiranih aktivnosti (opis djelovanja i realizacije projekata, ciljevi i očekivani rezultati sa specifikacijom troškova – finansijska konstrukcija, ime osobe odgovorne za realizaciju projekata);
- l) Izjavu odgovornog lica Udruženja da je Udruženje u skladu sa Statutom Udruženja redovno održavalo Skupštine Udruženja (izjava se preuzima na web stranici Općine Centar);
- m) Dokaz o aktivnom transakcijskom računu;
- n) Dokaz da Udruženje nema dugovanja prema Općini Centar Sarajevo (uvjerenje nadležne Službe- pribavlja se službenim putem);
- o) Druga dokumentacija koja se po potrebi dostavlja Službi za boračko-invalidsku i socijalnu zaštitu;

Član 7. (Obrada zahtjeva)

Dostavljene prijave na Javni poziv za finansiranje, Služba za boračko invalidsku i socijalnu zaštitu (u daljem tekstu: Služba) prosljeđuje Komisiji za nadzor i koordinaciju na obradu.

Član 8. (Komisija za nadzor i koordinaciju)

(1) Odabir projekata sa kojima su aplicirala Udruženja, a koji će se finansirati iz Budžeta Općine Centar Sarajevo vršit će Komisija za nadzor i koordinaciju (u daljem tekstu: Komisija) sastavljena od 6 (šest) članova. Komisija je sastavljena od predstavnika i to:

1. Službe za boračko – invalidsku i socijalnu zaštitu (1 predstavnik);
2. Službe za finansije (1 predstavnik);
3. Komisije za budžet Općinskog vijeća (1 predstavnik);
4. Komisije za boračka pitanja (2 predstavnika);
5. Koordinacija boračkih udruženja (predsjednik).

(2) Članovi Komisije – predstavnici Službi i tijela će biti delegirani svake godine prije završetka roka datog za Javni poziv.

Imenovanje članova Komisije izvršit će Općinski načelnik Općine Centar Sarajevo posebnim rješenjem.

Komisija ima zadatak da otvori prijave na Javni poziv, utvrdi formalno – pravnu ispravnost istih, izvrši odabir projekata koje su udruženja prijavila po Javnom pozivu i odredi visinu sredstava za svako udruženje pojedinačno po odobrenim projektima saglasno obrascu za bodovanje (obrazac je sastavni dio Odluke).

Član 9.

(Odluka o dodjeli sredstava)

Na osnovu obrađenih zahtjeva, Komisija utvrđuje Prijedlog Odluke o dodjeli sredstava za finansiranje boračkih udruženja od posebnog interesa i društvenog značaja za Općinu Centar Sarajevo, a u skladu sa planiranim i raspoloživim sredstvima u Budžetu Općine Centar Sarajevo i istu dostavlja Općinskom vijeću Centar Sarajevo na usvajanje.

Član 10.

(Ugovor o dodjeli odobrenih sredstava)

(1) Na osnovu Odluke Općinskog vijeća Centar Sarajevo iz prethodnog člana, Općinski načelnik zaključuje pojedinačno sa svakim udruženjem koje okuplja boračku populaciju, poseban ugovor o finansiranju kojim se regulišu međusobna prava i obaveze i drugi elementi bitni za realizaciju odobrenih sredstava, a u skladu sa ovom Odlukom.

(2) Ugovor o dodjeli sredstava sadrži sljedeće obavezne elemente:

- a) Pravni osnov za dodjelu sredstava;
- b) Osnovne informacije o davaocu i korisniku sredstava;
- c) Svrhu dodjele sredstava, odnosno za šta se dodjeljuju sredstva (naziv projekta, visina dodijeljenih sredstava);
- d) Ukupan iznos dodijeljenih sredstava;
- e) Iznose odobrenih sredstava po aktivnostima/projektima;
- f) Dinamiku i modalitete za doznačavanje sredstava;
- g) Izvještaje o aktivnostima/projektima i finansijsko izvještavanje, rokove predaje izvještaja (šestomjesečni i godišnji izvještaj);
- h) Uvjete raskida ugovora (osiguranje povrata sredstava u slučaju nenamjenski utrošenih sredstava, neadekvatnog pravdanja sredstava ili neblagovremenog dostavljanja izvještaja);
- i) Način rješavanja sporova (sud).

Član 11.

(Doznačavanje sredstava)

Doznačavanje odobrenih sredstava vrši se u skladu sa operativnim planovima i raspoloživim sredstvima u budžetu.

Član 12.

(Način korištenja sredstava)

(1) Odobrena sredstva, Udruženja moraju koristiti za odobrene namjene i to:

- a) Za aktivnosti/projekte obuhvaćene članom 1. Odluke;

b) Stručnu i pravnu pomoć članstvu u ostvarivanju njihovih statusnih pitanja (administrativno-tehničko lice, troškovi zakupa prostorija udruženja, režijski troškovi, kancelarijski materijal).

(2) Pravo na sredstva iz tačke b) ima administrativno- tehničko lice (isključivo dijete poginulog borca/šehida) Udruženja „Organizacija porodica šehida i poginulih boraca, Općine Centar Sarajevo koja se isplaćuju maksimalno do 1.400,00 KM (bruto) po osnovu ugovora o radu u iznosu od 45% od ukupno odobrenih sredstava za materijalne troškove, shodno raspoloživim sredstvima.

Ostala udruženja za koja se odobre sredstva za projekte kojima su aplicirali, mogu za administrativno- tehničke i stručne poslove koristiti sredstva u iznosu od 35% od ukupno odobrenih sredstava (rad lica odgovornog za provođenje projektnih aktivnosti, troškovi zakupa prostorija udruženja, režijski troškovi, kancelarijski materijal).

(2) Sva plaćanja se obavljaju žiralno, a gotovinska plaćanja samo izuzetno kada je to neophodno zbog prirode aktivnosti i uz adekvatno obrazloženje, uz prethodno dostavljenu Odluku Upravnog odbora i ugovora o djelu (5 % od ukupno planiranih sredstava) i pribavljenu saglasnost nadležne Službe).

DIO ČETIRI- PRAVDANJE SREDSTAVA

Član 13.

(Dostavljanje izvještaja i pravdanje sredstava)

(1) Udruženja kojima su dodjeljena novčana sredstva za tekuću godinu, obavezna su dostaviti izvještaj o utrošku dodijeljenih sredstava prema aktivnostima i Izvještaj o radu, usvojen od strane ovlaštenog organa udruženja sa narativnim dijelom i prilogima Komisiji putem Službe. Izvještaji se dostavljaju na propisanim obrascima koji se preuzimaju na web stranici Općine Centar Sarajevo.

(2) Kao dokaz o ostvarenim rezultatima i o namjenskom utrošku sredstava, udruženja uz izvještaje dostavljaju priloge: narudžbenice, predračune, fiskalne račune, potpisane spiskove korisnika usluga i druge priloge koji potvrđuju navode iz izvještaja.

(3) Komisija putem Službe dostavlja izvještaje o utrošku dodijeljenih sredstava sa mišljenjem Općinskom vijeću Centar Sarajevo na razmatranje i usvajanje, a u skladu sa Odlukom Općinskog vijeća Centar Sarajevo o rasporedu i visini budžetskih sredstava za finansiranje projekata.

Član 14.

(Praćenje i evaluacija dodijeljenih sredstava)

(1) Komisija uz stručnu podršku Službe prati i provodi evaluaciju dodijeljenih sredstava prema potpisanim ugovorima o dodjeli budžetskih sredstava. Komisija će nad provođenjem odobrenih projekata i ugovorenih obaveza udruženja koja okupljaju boračku populaciju Općine Centar Sarajevo o izvršenom nadzoru polugodišnje izvještavati Općinskog načelnika.

(2) Udruženja su obavezna na kraju tekuće godine podnositi finansijski izvještaj o utrošku ukupno dodijeljenih sredstava iz Budžeta Općine Centar, po ovoj Odluci, a uz stručnu pomoć Službe.

- (3) Udruženja koja se ne budu pridržavala odredaba ove Odluke, neće imati pravo učešća za dodjelu sredstava za narednu godinu.
- (4) Udruženja ne mogu aplicirati po Javnom pozivu koji se objavljuje prema Odluci o načinu odabira projekata nevladinih organizacija po LOD metodologiji.

Član 15.

(Obaveza održavanja skupštine boračkih udruženja)

- (1) Udruženja iz člana 2. ove Odluke dužna su održavati svoje izvještajne (jedanput godišnje) i izborne skupštine (svake četiri godine) u skladu sa odredbama Statuta udruženja.
- (2) U slučaju neodržavanja Skupštine, Općinsko vijeće zadržava pravo da ne prihvati zahtjev za finansiranje programa/aktivnosti udruženja, i u tom slučaju će se obustaviti doznačavanje odobrenih sredstava, do uspostavljanja normalnog funkcionisanja udruženja.

Član 16.

(Raskid ugovora)

Ukoliko se utvrdi da udruženje nenamjenski koristi odobrena budžetska sredstva, ugovor se može jednostrano raskinuti pismenom izjavom, a korisnik sredstava se obavezuje da izvrši povrat uplaćenih sredstava u roku od 15 dana od dana prijema izjave o raskidu ugovora.

Član 17.

(Obaveza pravdanja dodijeljenih sredstava)

Udruženja iz člana 2. ove Odluke koja ne opravdaju finansijska sredstva za prethodni period, ne mogu aplicirati za finansiranje programa/aktivnosti za narednu budžetsku godinu.

DIO PET- PRESTANAK STATUSA UDRUŽENJA

Član 18.

(Prestanak statusa)

- (1) Udruženju prestaje status udruženja od interesa i posebnog značaja za Općinu u slijedećim slučajevima:
 - Po zahtjevu udruženja;
 - Brisanjem iz Registra nadležnog organa uprave u kojem je udruženje registrovano;
 - Ukoliko se utvrdi da udruženje ne ispunjava ciljeve određene članom 1. ove Odluke;
 - Ukoliko udruženje ne realizuje aktivnosti i ciljeve uređene Statutom i programom rada udruženja;

- Blagovremeno ne dostavi izvještaj o utrošku dodijeljenih sredstava i godišnji Izvještaj o radu udruženja koji je usvojen od strane ovlaštenog organa udruženja-Skupštine;
- (2) Konačnu odluku o prestanku statusa udruženja od interesa i posebnog značaja za Općinu, donosi Općinsko vijeće Općine Centar Sarajevo, većinom glasova.
- (3) U slučaju ne usvajanja izvještaja o pravdanju dodijeljenih sredstava od strane Općinskog vijeća Centar Sarajevo, Udruženje gubi status.


DIO ŠEST- ZAVRŠNE ODREDBE

Član 19. (Realizacija)

Za pružanje stručne pomoći Komisiji zadužuje se Služba za boračko-invalidsku i socijalnu zaštitu koja vrši pravne, administrativne, tehničke i druge poslove vezane za realizaciju ove Odluke.

Član 20. (Stupanje na snagu)

Ova Odluka stupa na snagu narednog dana od dana objavljivanja na oglasnoj ploči Općine Centar Sarajevo, a naknadno će biti objavljena u Službenim novinama Kantona Sarajevo.



Broj: 01-37-808/23
Datum: 28.12.2023. godine

Odluka je objavljena na oglasnoj ploči Općine Centar Sarajevo dana **08-01-2024**